

Чин ораз - гўзал иймон



13:55 / 08 январь 740

Осмондаги ойнинг изин ким кўрган,
Қадам етмас тоғнинг музин ким кўрган,
Жаннат таомининг тузин ким кўрган,
Кўрсатгин, деб Ҳақдан бирга сўрайлик.

Тинчлик тилаганнинг тилида боли,
Тинч юртда булбулнинг гулда хаёли,
Маърифат меваси - миллат камоли,
Элу юрт тинчлигин бирга сўрайлик.

Дил-дилга вобаста, қўл-қўлни танир,
Эл-элга вобаста, йўл-йўлни танир,
Ғаним ёмонлиги яхшини янир,
Аё дўст, ниятни нурга ўрайлик.

Аллоҳ азиз қилгай ҳалол юрганни,
Олов олқишлайди қўрда турганни,
Ҳавасини қилинг, қандин урганни,
Сийланган одамни гулга ўрайлик.

Инсонга чин ораз - гўзал иймони,
Меҳру муруввати бахтин посбони,
Ойдан айрилмасин умрин осмони,
Дуодан тўкилган дурга ўрайлик.

**Ўзбекистон халқ шоири Маҳмуд Тоир
«Ҳилол» журналининг 8(53) сонидан**